

Sra. Clark habitante di Village,

“Nos ta contento cu e ‘New Look’ di San Nicolas”

UN aña pasa e area entre Postkantoor San Nicolas y Oficina Auxiliar di Gobierno tabata un espacio habri, trafico ta pasa y no tabatin un ambiente di recreacion. Awendia e situacion ta completamente diferente, aunke cu e trabou no ta ful cla ainda.

Gabinete Mike Eman a traha un plan di renobacion no solamente pa centro di Oranjestad pero tambe pa San Nicolas. Den e Plan BoAruba, a inclui e plasa cu ta forma parti di embeyecemento di e area pero tambe pa relaha y diberti pa e habitantenan cu ta biba rond.

Un di e parehanan cu sa mira den forma regular sinta riba e bankinan di e plasa, disfrutando di e ambiente, ta Sr. y Sra. Clark, kendenan ta biba den Village. “Mi ta masha contento cu e ‘new look’ di San Nicolas. Nos ta acept’e cu man habri,” Pauline Clark, kende ta traha na un hotel grandi, a duna di conoce. El a agrega cu ki ora cu e ta liber, e ta bini hunto cu su casa pa nan disfruta di e bista. Den oranan di atardi e por mira muchanan ta core bicicleta rond, cu ta demostra cu habitantenan ta haci

bon uzo di e plasa. E plasa cu antes tabata un area cu masha poco espacio pa e habitantenan por disfruta di dje, awendia a wordo remodela completamente, cerando e area pa trafico y a crea un solo plasa grandi, cu klinkers, banki y diferente tipo di mata cu a wordo planta. Algun cu ta atrae tur sorto di barbulet, creando un ambiente agradabel y otro ta matanan mas grandi cu ta brinda sombra na esunnan cu durante dia kier tuma un descanso riba e plasa. E plasa ta situa net na entrada

di Sint Maartenstraat, Village, cu tambe ta den renobacion. Den oranan di atardi e habitantenan grandi ta sinta combersa regularmente riba e plasa aki, cu ainda no a haya un nomber ainda.

Gabinete Mike Eman semper a boga pa trece e sentido di union di antes cu tabata existi den barionan di Aruba, encurasha comunitarismo y tipo di proyectonan manera construccion di e plasa ta trece e bario hunto, principalmente durante eventonan.

